

焦太史編輯國朝獻徵錄

焦太史編輯國朝獻徵錄卷之二十九目錄

戶部二

尚書

韓文

顧佐

劉琬

孫交

石玠

楊澤

侯觀

郭宗仁

李瓚

鄒文盛

梁材

李廷相

王杲

王睥

李如圭

張洞

方鈍

黃應春

耿定向

楊俊氏

金陵黃應春

同校

吳興茅元儀

錢 徐象樞刊行

焦太史編輯國朝家範錄卷之二十九目錄終

焦太史編輯國朝獻徵錄卷之二十九

戶部二

尚書

光祿大夫柱國太子太保戶部尚書贈太傅諡
忠定韓公文基志銘

楊一清

嘉靖丙戌二月十五日致仕太子太保戶部尚書韓
公以疾卒於家有司以聞 上若曰是爲先朝耆舊
清修忠亮望重一時其贈特進光祿大夫太傅諡忠
定賜誥命諭祭九壇有司給付棺木喪儀冥器爲營
葬域皆特恩也公諱文字貫道號質菴舉成化丙戌

進士授工科給事中出爲湖廣布政司右叅議轉左
叅議擢山東左叅政弘治間擢雲南左布政使尋擢
都察院右副都御史巡撫湖廣備運軍務改巡撫河
南召拜戶部右侍郎改吏部進左侍郎尋擢南京兵
部尚書兼贊機務召拜戶部尚書正德改元時賊璫
恃從龍舊恩竊持機柄威福自恣勢焰薰灼士大夫
側足立道路以目莫敢頌言其非公倡於諸公卿科
道云若是不已將危及廟社乃合辭抗章暴其罪狀
請置之法以安人心 武皇始而覺悟旣乃爲羣姦
所惑置之弗問理由是益橫乃矯詔降公職級致仕

又矯令落職閑住瑾伏誅以廷薦得復舊官致仕
今上嗣登大寶賜勅遣官存問特加太子太保階光
祿大夫勲柱國有司月給米四石歲給廩祿六人且
賜之誥命贈其先世悉如其官廕一孫爲光祿寺署
丞公平生政跡甚多而晚年抗疏誅瑾一節尤卓犖
奇偉故先書其大者如此公上世出相州宋魏公之
裔也七世祖諱永避金亂徙山西之洪洞因占籍焉
曾祖諱昌祖諱淵父諱肅皆以公貴累贈光祿大夫
柱國太子太保戶部尚書曾祖妣李氏妣吉氏贈一
品夫人公生時吉夫人夢紫衣人語之曰吾送文路

公與爾父因以文名公少文思溢發領成化乙酉鄉
薦登進士其爲給事持節詣韓藩行冊封禮贈遺一
無所受嘗與同官會劾總制憲臣要功起邊釁及薦
起前吏部尚書曹南李公兵部尚書河湟王公辭涉
近幸 憲皇怒幾不免勘理邊帥諸不法事酌情與
法輿論稱平吏部屢薦爲都給事中爲忌者所沮竟
以九載滿考始得遷官外藩其爲叅議提督武當山
兼撫流民敬神恤民一剷宿弊禁鎮守中貴侵漁節
省浮費以其羨餘易穀萬餘石備賑分守襄南平稅
理冤勘處夷情聲望日著參議以右轉左蓋昔所無

亦忌者沮之耳其在雲南雪冤疏滯尤多爲湖廣巡撫會征貴苗接濟軍儲底於成功被勅獎諭武昌諸郡歲荒上疏蠲稅停租移撫河南懷孟以北旱飢民多流徙檄令所司發銀分賑多所存活民方東作牛種無出公令官措給之是歲大熟民乃安守備武臣有不律者按而治之羣屬凜凜其爲戶侍佐尚書太原周公清冗食革黃綠比遷吏侍署部策久之采資望用人藻鑑精當南京參贊尚書缺人僉謂非公不可至則留務一新屬歲飢米價騰踊死者相枕籍公客戶部將官軍糧俸預支三月以濟人急度支以未

得命爲辭公曰救荒如救焚民命在日夕安能思慮
以待卽得罪吾請當之遂發十六萬石米價漸平人
不病糴往者留都事惟內守備令是聽公多所裁定
上下稱便焉 孝廟亮其公勤故有地卿之命屢辭
不獲嘗召見諭以鹽法積弊欲議處釐革以充邊餉
陳六事指摘弊端甚剴切 孝廟嘉納行之於是數
十年積弊大蠲滌除殆盡屬時大婚大喪相繼西北
邊情告急命將出師經費不貲又值更化之初貨賈
所費不可勝紀公悉心經畫至忘寢食供應罔缺連
兇羽流幻妄之徒所盜內帑錢物裁抑戚畹中貴占

奉和買民田及舉正窩占引鹽乞停級造皆事干權
倖怨讎叢集人爲公危之公裕如也 武皇登極命
侍經延親耕籍田與九推之列賜白金文綺寶鉞幸
太學釋奠先師孔子預分獻禮吏部尚書缺人言官
交薦公又爲忌者所沮益未幾而伏闕之章上奇稱
作矣時其長子士聰爲高唐知州士奇刑部主事瑾
皆勒令除名瑾內銜未已乃拊摛部曹遺失簿籍舊
事械繫至京下詔獄考訊欲置之死公與司馬東山
劉公在因國倡和自若人服二公雅量理官狀上仍
請旨罰粟一千石監押赴大同覲納績以他事數次

詞累二千餘石自是業產蕩然兼稱貸以給公亦不
以爲意越二載罪人伏辜詔還職并士聽士奇俱得
致仕兩京言官交薦公才望氣節足勝大任不報于
在吏部數薦之亦不果比國是既定論大明而公
年逾八十老且病不任事矣公雖不出而聖旨誥命
先後疊降所以尊崇褒勵之者近歲所無天下想望
其風采有裴晉公韓魏公之風焉而天不畀之上壽
遽爾考終足惜也卒之前二日雷電大作屬續之辰
烈風四起天宇晦冥弔者如市皆哭置哀中外竊悼
聞訃俱痛惜不已公家居行義可述者甚多鄉里化

之惟恐惡聲入其耳著有質菴奏議歸田錄若干卷
行於世原配張贈一品夫人蚤卒獨居三十年恒金
糟糠不再娶距生正統辛酉年八十有六

康陵初卽位青宮舊內侍劉瑾等日導

上大馬廐

鬼舞唱角觥廢萬幾公每朝退輒泣屬吏李夢陽說

公大臣義共休戚徒泣何益比言官交劾諸內侍章

下閣閣老持劾章甚力公誠及此時率諸大臣疾爭

閣老又得諸大臣爭持劾章必益堅去瑾輩易耳公

乃具疏以進曰臣等待罪股肱值主少國疑瞻前顧

後心焉如割中夜起嘆臨食而泣者屢矣近歲朝政

日非秋來視朝漸晚仰觀聖容日就清臞皆言太監
馬永成谷大用張永羅祥魏彬劉瑾丘聚等置造巧
僞淫蕩上心擊球走馬放鷹逐犬或俳優雜伎錯
陳於前至導其乘輿外人交易狎暱褻嫖無復禮體
日遊不足夜以繼之勞耗精神虧損至德遂使天道
失序地氣靡寧雷異星變桃李秋華考厥占候咸非
吉徵切緣此等細人惟知壘惑君上以便行已私
不思皇天眷命祖宗大業皆在陛下一身今大婚
雖畢儲嗣未建萬一起居失節雖將此輩莖粉何補
於事昔我高皇帝艱難百戰取有四海列聖繼

承傳之先帝以至陛下先帝臨崩頒命之語

陛下所聞也奈何姑息羣小置之左右系望德乎今馬永成等罪惡既著若縱不治將來無所忌憚爲患非細伏願奮剛斷割私愛上告兩宮下諭百僚將馬永成等明正典刑以回天變洩神人之憤潛消亂階以保靈長之業疏入上驚泣不食理等大懼初閣老持言官章不肯下閣瑾等窘已相對泣會諸大臣疏又入上遣司禮監八人詣閣讓一日三至閣益持議不肯下明日忽召諸大臣入洛陽語王鏊曰事且十成七八諸公第堅持至左順門太監李榮手

諸大臣既曰有 旨諸先生愛君憂國言良是第獻
辦事 上久不忍卽置之法幸少寬 上自處是日
璫等益窘自求去南京安置因關議堅持猶不肯下
璫等無奈何乘夜繞 上前跪伏哭頭觸地曰敎
上恩奴儕且磔啜狗 上色動璫等益復伏地痛哭
不止曰狗馬鷹兔何損萬幾左班官敗譁無忌者司
禮監無人耳有則唯 上所欲爲誰敢言者於是
上立詔璫入司禮監連斥洛陽餘姚二關老自是璫
益專權矯詔奪公官二子士聰士奇皆黜氣又矯詔
遣公詔獄欲殺公會 有技匿名書者三千石

資善大夫戶部尚書贈太子太保簡菴顧公佐

神道碑

王 鑒

顧之先本吳人國初徙民實臨淮公曾祖彥華在徃
中遂爲臨淮人今鳳陽也祖瑛累贈左副都御史考
震順天府治中贈左副都御史公諱佐字良弼登成
化乙丑進士授刑部主事歷員外郎郎中時錦衣衛
都指揮牛循嘗怙勢殺人鎮守宣府太監顧雄分守
紫荆關監丞鍾欽事多不法公按治其罪議者謂公
有守矣出知河間府畿甸也貴戚莊田基峙境內聞
公至皆戒其下不敢乘勢輻輳先是定徭役悉委吏

胥多寡高下一出其手弊當孔道老奸有靈暗竊
中公會校出入據籍侵晦定爲程式其弊遂絕郡有
瑞蓮秀麥之謠政聲流聞建四川按察司副使整飭
建昌兵備越雋山崩地震民震駭蕩析公愍心力撫
補增修屯堡哨戍民以安堵徵拜大理少卿尋遷左
僉都御史巡撫山西提督鳳門諸閭改南京都察院
提督操江進右副都御史戶部右侍郎久之陝西三
邊告飢 孝宗命公兼食都御史往蒞之召至御榻
前詢問慰勞賜以白金文綺有如朕親行之語且願
近侍紀之公至條陳便宜多方區畫始有三年之積

英正德初戶部尚書韓公文率百官伏闕上疏得罪
去公實代其位旋有玉帶麒麟服之賜時逆瑾盜政
威權日熾士夫見者多爲諛詞諂貌公自若也瑾諷
諸司各進羨餘以入私藏公曰吾部無羨餘者瑾銜
之未發也瑾憾韓公不已捃摭百方無所得會部有
故冊逸弗得瑾欲以爲韓罪嗾公上其事公持不行
因奪俸三月公曰可以去矣遂引疾乞歸疏再上得
允卽行瑾令選人日謂其過無得意未憚時命官校
三邊儲儲有紅腐則以爲公罪公時去邊三年餘矣
詔司輸米八百石於邊邊東邊糧以救易朱弘治中

有旨准行又以爲公罪罰輸三百石戶部有缺失又以爲公罪罰輸百五十石公素貧殫家資以輸不足稱貸益之人皆冤之公無懟色正德丙子十一月卒于家春秋七十有四逆瑾伏法公事益明至是計間詔賜太子太保有司造葬遣官謫祭如故事

資政大夫戶部尚書近山劉公璣墓誌

許宗魯

近山先生者姓劉氏諱璣字用齊別號近山陝西咸寧人也高祖清甫曾祖敏中祖懋父鑑母李生先生爲兒時游鄉塾卽端重不嬉戲鄉塾胡先生異之曰是兒骨相不凡後當名世戴恭簡公來督學課試先生見其文特器之乃以補諸生成化庚子舉鄉試第二人明年辛丑登進士壬寅授山西曲沃縣知縣人方患其年少不習事先生至縣砥礪苦節收行古道期年邑人向化曲沃產粟先生視事多以粟贖罪遂

儲聚數萬計後歲大侵賑粟不繼卽繼以棗民賴不
飢民有共貲而倍利者訟于邑先生曰汝聞管鮑分
金事乎訟者慚乃委金願輸官先生爲平遣之其專
務德化不尚法令類如此他若疏夢泉均景水寬刑
罰平差遣廣儲蓄恤筦御諸善政咸載去思碑是時
曲沃治行爲天下最部使者上之弘治壬子召赴吏
部太宰王端毅公重其治行欲授御史先生辭不受
王公復欲以爲吏部屬先生曰辭御史受吏部是僣
要以便私也王公義之爲授戶部山西司主事未幾
督餉大同道過曲沃人間先生來扶老携幼迎謁道

左留邑數日立生祠祀之戊午

敬皇帝詔大臣舉

所知能守郡者於是左司徒許襄毅公疏薦先生陞
江西瑞州府知府瑞故曠郡無城郭依山聚居民狂
悍善劫郡人苦之先生視郡首著勸諭文繪善惡圖
標揭境內賊黨稍稍解散一日周黨狂悖先生率兵
撫禦賊奄至擁先生歸其寨既至乃召其魁諭以禍
福賊乃羅拜堂下已乃治具享先生蓐食酣飲夜就
寢坦腹睡齁齁賊衆環聽相語曰劉公大人也我輩
不復敢爲惡矣居三日乃還郡境內寧謐乃遂興學
正俗表節崇讓均賦薄稅節用省刑期年瑞乃大治

辛酉朝覲量移九江府瑞民思其惠愛立三太守祠
先生居其一至九江僅幾月丁母李夫人憂歸是時
虎谷王公督學陝西倡明道學敦延先生居正學書
院講論性理三秦學士翕然宗之甲子復除湖廣衡
州府知府衡薦饒適疫作先生下車禱神修祀施藥
賑食孜孜若不及民賴以存時過石鼓書院爲諸生
談說經史及性理諸書衡士喜曰我輩今日復從未
張游矣正德丁卯雍王薨於衡 朝廷遣太監黃某
護喪還京師時太監劉瑾用事閹人怙勢掠賄侮人
至衡見先生首以禍言恐動繼卽大需供億尤以玩

事視先生時時戒曰王樞某日行舟及楫師擾衆諸
所供給其宿具且無煩民否則罪不貸先生唯唯至
期舟備篙師良挽夫健且溢其數人各負米鹽槁魚
備需於湘潞吏人唱名執役無煩呼促黃異之以問
役人對曰府官閑貴人來業已先三月儲之矣黃某
曰咄咄好官幹事愛民乃若此耶遂戒命僕從毋需
索有司黃至京覲劉瑾問以所過地方事黃首以先
生治衡善政對時瑾用人多以賄遷臺諫以爲言旣
聞黃道先生善乃屬意用先生以塞羣議遂擢太僕
寺少卿先生去衡衡人德之樹棹楫表遺愛云明年

戊辰陞太常寺卿提督四夷館先生力以驟遷辭不
報無何陞戶部左侍郎卽又陞尚書先生辭益力疏
曰臣由知府轉少卿已爲殊遷由少卿數月而陞卿
由卿而累遷尚書祖宗任官確有定式今若此是使
成憲由臣而毀 陛下縱眷臣其如祖宗之法何臣
竊不敢就疏屢上不允乃赴部視事尋以例侍經筵
賜楮鏹千貫尋又賜玉帶并御製諸詩十六幅貞觀
政要六部爲尚書甫二年乃誥贈祖及父皆爲資政
大夫戶部尚書祖母任母李及配王皆二品夫人張
封二品夫人蓋殊恩也謹方擢先生時意先生必德

已所爲必附已及先生素節自守不形言謝意稍悔
之然以先生人望所屬必欲引以自飾先生乃益疎
略自晦每朝退署部畢卽閉門縱飲酣臥不醒瑾欲
延問事情率醉不能起他日瑾勝氣詰之先生曰氣
弱非酒不能支且嗜睡不睡則病由是益疎遠矣瑾
性好紛更先生於部事遵舊不易瑾殊不說嘗力論
時宜變更先生曰祖宗立法盡美盡善行之萬世無
弊亦惟不愆不忘率由舊章而已瑾又怒一御史欲
加戕害先生適過瑾問其故瑾云云先生曰以足下
所云將以懲不法也今某所爲誠守法將以懲不法

顧先罪守法者吾恐眩人耳目矣瑾爲改容謝之某
賴以不死其他陰爲止畜釋助若此者衆先生不以
語人故人亦莫從知也是時瑾急賄自封巧宦者多
重輦通致先生從容語瑾曰飲食以養生過食則傷
生貨財亦然是故貨也者禍也古人戒積藏其畏禍
也瑾積憤先生不附已欲改南京禮部又欲援國初
例出爲布政使尋事敗不果瑾敗先生乃上疏自劾
曰臣與劉瑾實同鄉里誤被引用驟遷顯官今瑾事
敗臣罪當誅戮 皇帝雅知先生廉靜方直不爲瑾
用特准致仕乃庚午八月先生西歸旣歸里無華屋

野無腴田囊無羨金緼袍脫粟泊然一布衣也居鄉
二十餘年耕讀自樂與人接油油然惟恐有傷而中
操介削屹不可移雖不謝絕公府然卒無所干預故
人益敬重之晚年恬放自適多從鄉人飲飲輒盡量
醉爲歌詩皆發性情有淵明之遺意焉卒之日雷風
晦冥聞者慟悼嗚呼若先生者可謂始終全德生榮
死哀者已於是巡撫都御史王公巡按御史毛君列
疏上請其略曰故戶部尚書劉璣賦性純樸與物無
競歷官中外多效勤勞家居二十餘年仕進全不前
慮敝廬破屋不蔽風雨惡衣糲食僅免飢寒四方慕

其清修鄉邦稱其恂謹進退有益生處無憾 課下

禮部覆議相同遂得如例遣官諭祭二壇有司管葬
許宗魯曰魯與近山先生居比隣事先生如諸父有
獨知之者一二事魯爲諸生時過先生所見座上一
儒生携畫工圖先生像貌問其故曰曲沃舊祠肖公
蓋壯年像今公老矣曲沃人思見公不可得願圖歸
以慰之頃年魯提學湖廣巡視及衡衡人知魯爲先
生鄉後學者老數十輩相率詣學臺問先生起居他
日造學聽諸生講誦諸生爲魯言往年督學僉事靜
齋陳公視學諸生進講太極圖意義微妙陳公詰之

經學
升請
太守
講太
極圖

諸生具以受說於先生對陳公驚曰此學不講久矣
太守能然乃請先生坐堂上講太極圖先生升座畢
講殫述精微陳公率諸生拜曰是吾師也于是湘潭
以南學者多從先生受理學云魯巡衡時向所樹道
愛綽楔爲近守建譙樓撤去衡人思先生德惠布狀
請復魯爲施行未三月遂以完報比再至衡則見其
煥然新美越於舊制矣嗟乎今之仕宦固有駕車而
掃迹者矣何仁人之思獨永久邪冀魯游京師假館
興隆寺守寺門者陳老故先生隸也嘗過魯言先生
爲戶部尚未製緋袍冬月朝會公卿皆緋紵袍先生

獨絳紗袍同列餽以緋紵先生義不受直至郊賜始
製服日至部視事過午堂食止市餅四枚茶一盃耳
時劉瑾行賄天下諸司當朝覲入京多賚重寶以賄
當路嘗見其數帖獨無先生姓銜一日有人扣門餽
玉珮帶適陳老當門怪問其始無是事何由至也餽
者大驚踉蹌趨去曰我以為吏部劉宅是戶部劉宅
邪又言當時諸公卿過瑾所率庭叅先生過瑾特入
內不庭叅以禮自持不少貶屈瑾恐其持禮損己威
重故特爲內覲不知者謂爲厚昵誤矣誤矣是時先
生去位十餘年故隸能道其節義如此

光祿大夫柱國太子太保戶部尚書贈少保謚

榮僖孫公文傳

廟 璠

公卿國之幹人士之表也德操風誼之所漸沿國運
世道因之盛衰不可以微細觀也璠仕弘治初猶及
接見 英憲二朝諸先進至于今有遺慕焉戶部尚
書九峰孫公其一也公名交初名蛟鄉試舉入太學
丘文莊時爲祭酒大見器重爲更今名字志同其先
本廬之合肥人五世祖銘方 高帝兵起兄弟六人
迎於采石旋以功授湖廣安陸衛正千戶弟淮達皆
百戶天下旣定銘卒子虎及炳入見 高帝撫之曰

吾部曲兒也虎讓官柄調陝西西安右護衛自居安
陸故今子孫爲承天人虎生毅毅生盛盛生忠忠生
公後公貴贈祖考皆資政大夫南京吏部尚書公舉
成化辛丑進士初任南京兵部車駕主事器識已緒
見尚書王端毅公轉吏部卽薦陞稽勲員外郎尋調
文選樂與謀議甚合陞驗封郎中乞歸省遂丁父母
憂起復補稽勲郎中調文選前後居吏部十四年留
意善類多所援引飭躬勵行人莫敢干弘治辛酉遷
太常少卿提督四夷館 上遣經略黃花鎮諸邊陞
賜金綺以行公親歷險要指畫方略增塙墾廣樹藝

俾虜騎不得馳突請罷邊衛柴炭折銀以蘇軍困銓
衛學教授以訓武官子弟併條陳邊務數事皆見嘉
納正德丙寅擢光祿寺卿時權倖橫濫公操節縮得
免大匱戊辰進戶部右侍郎提督倉場時內外倉紛
置宦豎漕卒大困公上疏極論得裁其半已巳改吏
部右侍郎逆瑾驟用陝人張綵爲尚書更張躁妄人
無敢言公累引王端毅故事爲諷綵銜之調公南京
吏部瑾等敗誅進南京吏部尚書辛未召爲戶部尚
書賜玉帶麟服及中禁書會錢寧等復幸與諸佞倖
姦請鹽引蠹撓邊計公拒止極爲憂勤時燕齊河洛

及三蜀之間大盜並起召諸邊勁兵入討劑量供饌
遠近無乏初上用言者議改故妖僧繼曉永昌寺
基爲太平倉命公董治已而改賜倖臣朱德公上疏
言積貯天下大命是地毀民居數百家費官銀十餘
萬已傳聞四方昔田蚡外戚請考工隙地益宅漢武
尚怒不許德何人可輕畀此遂已雲南銀坑領千鎮
守太監毒民御史請屬有司公言滇南夷方大利所
興恐後遺患封之便諸沮抑權貴類此者衆諸豪因
誣上令公與禮部尚書傅公珪皆致仕朝著駭愕
給事中李陽春御史原軒等與南臺諫並疏謂二臣

人望不宜聽其去不報居無何 今上繼統召爲戶部尚書固辭不允乃起慨然以天下自任首論京通倉增置內臣太冗蠹尅漕卒且以闡豎預邦計非祖宗制乞一切剗革責成戶部 上裁其半着令勿增次論御馬監內臣宜遵祖訓專管蕃牧不宜臨筦輸納芻豆宜令戶部通知馬數杜其侵耗上林苑監本以牧牲植蔬今內臣奪其地役其人百姓重困乞革去內臣歸地于民皆從之又請革廣東採珠內臣論安陸皇莊租課宜付有司不報大禮旣定希合之徒上言請遷 獻皇帝陵公極論山陵事重我 太祖

初欲遷

仁祖於鍾山慮泄霧氣而止具載皇陵碑

今宜斷自宸衷凡紛更私議悉勿聽竟寢公前後居戶部時值國用告急多方節裕尤慎于鹽法至若權宜輸粟唯生員入監一途執不宥公壬午以三載考績上遣中使賜羊酒癸未疾遣醫視療命中使賜珍膳既愈上疏乞休有曰臣恐不獲生還復如毛澄矣時禮部尚書毛公澄乞骸道卒上聞惻然允其

請手詔加太子太保令子編修元侍歸並給傳有司

時加存問月給食米歲給夫隸復賜寶鑑爲道里費

公謝辭不允戊子恩詔晉光祿大夫柱國

壬辰壽八十終

戶部尚書石公玠傳

石玠藁城人父玉登天順甲申進士擢監察御史至
山西按察使性耿介端方尤嚴義方之訓故玠與弟
珣奉教惟勤同登成化丁未進士珣改庶吉士玠授
汜水縣知縣有惠政召爲河南道監察御史嘗奉
勅覈大同邊儲按甘肅復按陝西邊務興革悉中機
宜監臨鄉試時號得人乙丑推綜三法司事左都御
史浮梁戴珊素知玠事無巨細悉委之正德丙寅陞
山西按察司副使督學政教人以修德行務經學爲
本歷本司按察使陞右布政使尋轉左至是去父玉

按察公舊治僅二十年而吏民安其政如按察公時
人以爲世美常作瞻栢堂以志感辛未陞都察院右
副都御史巡撫大同玠久歷邊陲習諳戎務凡將領
而下量才任使皆得其宜間有違法者裁以大體不
爲深文小苛故人爭盡力邊境用寧未幾入爲兵部
右侍郎遼東諸夷不靖命以左侍郎兼右僉都御史
往諭之玠宣布威德卽相率歸服乙亥陞戶部尚書
留心國計酌盈濟虛時武宗數北巡日有調集軍
費不貲玠經營籌畫未嘗告匱會錢寧竊權阻壞鹽
法累執奏與之忤被讒奪俸因疏乞骸賜勅乘傳還

須歸杜門却掃意緒澹然喜讀國語左傳尤好淵明
樂天詩所著有東渟漫稿藏于家

玠由右都御史轉戶部尚書特守甚嚴苞直絕跡會
上在宣府需銀百萬兩玠言國賦匱竭不從乃以其
半應命時權寵紛紛競干鹽課玠一切弗許衆咸怨
之 上欲南幸羣臣切諫悉杖之於 朝玠上疏論
棟諸怨者因而構毀乃令自陳遂乞休

榮縣大夫戶部尚書張公楊公澤墓志

張文憲

公諱澤字宗淵別號紫采姓楊氏保定新城人也六世祖懷忠元延佑中進士官至開封尹生晉卿生士文士文生雲國初以孝義聞雲生玉功授錦衣衛百戶玉生能寔惟公考祖若考俱以公貴累贈資政大夫戶部尚書祖妣崔氏宋氏俱夫人公始生母夢火光入室資政公異之曰是文明之象也公後累領敏書史日記千言成化丙午魁順天鄉薦丁未登進士第觀吏部政冢宰三原王公嘉其老練初授刑部主

事審克簡乎獄無冤滯嘗冬月提牢憫囹圄之苦令
餽食以時無給椒飲衆囚德之弘治癸丑丁外艱乙
卯服闋擢光祿寺丞光祿典大庖供億繁夥公出納
詳明百務胥飭中官革宰等七十人餽廩先奉旨
住支復營傳懿旨覲再得公疏爭之事下禮曹議
竟得請其它省浮費寬民力祛宿弊良法率稱是庚
申陞本寺少卿聞譽益彰著癸亥再考授奉政大夫
正德改元將命祭告海岳回上民瘼四事切當時務
未幾轉南京大理寺丞始至卽視篆適魏國公僕犯
謀殺人罪有欲高下其手者公鞠得實竟寘于法丁

卯改北大理轉左丞進少卿於時逆瑾掌內廠專事
羅織其叅送諸獄每乖正法公堅執不少阿廣寧伯
義男爲其叔毆死瑾坐抵命公曰縱使親姪孫法且
不宥矧義男孫乎不從瑾銜之乃摺撫它事罰出穀
五百石然輿論惟公是直也已巳陞光祿卿公修厥
初政而剔蠹益力辛未陞戶部右侍郎總理倉場
命初下會征討流賊改公隨軍督餉公請發帑銀分
路糴復取存留者從權協濟儲悉盈羨公以兼憲職
乃劾奏山東巡撫張鳳酌酒怠政捕盜都憲甯果及
指揮江彬貪功妄殺併論諸將老師玩寇疏入上

嘉之鳳坐落職餘司治有差仍降 旨切責董師者
一時風裁凜然蓋自是諸師始協謀戮力而賊平矣
捷奏晉公俸一階廕子入監賜宴于禮曹兼有金幣
銀牌之賜癸酉轉左侍郎甲戌考績再承廕如例丙
子奉 勅修理京東運河橋道甫落成復拜命督餉
于宣大時虜壓境兵馬大集公區畫有方遠邇城堡
胥各充備事竣還 上賜麟袍及金幣復廕子如初
戊寅陞本部尚書總理倉場公具疏辭 上以溫旨
慰留先是督倉中貴率憑籍專愎公接遇以禮而事
不與議且歸併剝糧革久濫官擯以祛煩擾平收斛

面以絕通萌人咸服公剛正己卯改蒞部事尋賜蟒服玉帶以榮之適寧藩邁變上親征百官景從供應急于星火加以恩倖之賞賚無紀客兵之支費益增公劑量計處日不暇給隨取具足中外倚之庚辰考績上遣中使頒賜羊酒楮幣授資政大夫上賜二代及元配高氏封繼配王氏如制是歲冬駕自南旋駐蹕通州時江彬擅權矯詔召公欲報復加害公芻粟餽餘無隙可乘竟弗遂辛巳夏公倦勤懇乞骸再上始得旨戊子以尊號覃恩詔進榮祿大夫甲午公卒訃聞上命禮官諭祭者二命工部營葬

原通如終人咸榮之

資政大夫戶部尚書贈太子少保侯公觀墓誌

銘

楊廷和

公諱觀字士賓姓侯氏其先山東諸城人永樂初曾祖諱文質以開右徒實畿內遂占籍雄縣祖諱林王府庫大使俱贈資政大夫南京兵部尚書曾祖妣柳祖妣王俱贈夫人父諱瓚南京工部尚書進階榮祿大夫母王氏贈夫人公以成化十三年舉鄉薦明年第進士試政戶部又明年授河南登封令勤恤民隱蒔剔宿弊已有豪猾武斷鄉曲父子濟惡人以虎目之公廉得其情置之法積害頓除十八年大旱繼以

瘟疫公禱于中獄願以身贖移時雷電交作大雨如注病者以起歲亦大熟二十年復旱流離餓殍枕藉道途公發倉賑貸老羸不能支者爲粥食之賴以不死者甚衆部使者交薦之以治行異等徵時榮祿公爲兵部侍郎例不得任御史乃授戶部主事弘治二年淮徐大水奉命往問百姓疾苦奏免其租稅有差丁母憂服闋復除舊官九年陞員外郎進郎中十四年行河督漕運令嚴而信領運者皆如期而至尚書周文端公器之雲南司缺郎中薦公自江西司調補其處蓋雲南司屬京府事倍他司故也部中章奏多

以委之十八年陞南京太僕寺少卿既之任念勞
公年老留京師疏乞終養榮祿公樂之比卒哀毀益
甚正德五年改太常寺少卿提督四夷館尋晉本寺
卿七年陞戶部右侍郎總督京通倉場明年理部事
又明年虜入宣府大同二邊十一年盜起畿內皆

命公兼左僉都御史理軍餉有白金文綺之賜轉左
侍郎武宗北巡應州之役復兼憲職隨軍給餉班
師賜飛魚衣三襲廕一子世官十四年陞尚書仍
總倉場疏請裁冗食停工役以實京儲下廷臣集議
咸是公言謂宜卽令臺諫查革不報 个上御極乞

休致仕溫有雨之四上乃得請令有司給廩月三石
與隸歲四人公感泣謂其子孫曰主上之恩厚矣
吾無以爲報汝曹勉之既退杜門謝客終日端坐閱
書史聞親友至則飲酒數行與與如也久之歸雄縣
得疾不起時嘉靖壬午九月十七日也訃聞上悼
之贈太子少保命禮部諭祭者再工部治塋城我
朝人才之盛遠出前代百五十餘年來父子官尚書
者纔七家公其一也亦可謂世家也已

資政大夫戶部尚書鄭公宗仁墓誌銘

楊廷和

公諱宗仁字體元姓鄭氏其先河南祥符人自祖遷徙曰丘遂家焉祖鐸父綱俱以公貴累贈資善大夫戶部尚書祖母陳母宋俱夫人公生而慧悟老長密之年十一補縣學生隣有喧從地躍起盤旋人惟之公至輒墮或曰是豈凡子哉成化十六年舉順天府鄉試魁二十三年第進士擢戶科給事中弘治二年奉勅覈薊州邊儲薊姦剔竊人咸畏焉巡視光祿寺陳飾供應專任使實邊儲汰冗食四事五年天下

郡縣以災告者百九十餘處公疏請賑卹明年災倍
於前復疏言之有建議者以國用不足欲令齊民得
入粟受千百戶仍帶俸公曰名器濫至是耶此令一
下軍士將解體況一時所得不足償帶俸之費抗疏
言之復上崇聖學嚴考察理冤滯三事多見采納晉
尚寶司丞十七年轉南京太僕寺少卿陳馬政四事
深切時弊正德四年改太常寺少卿明年晉南京太
僕卿尋改北奏增庫官一員典錢穀六年改光祿卿
時權奸用事費出無經公據弘治初元供應例日省
百金 先帝偶幸光祿涼樓公承 命進芽茶等物

僚屬少之且虞得罪公曰有罪在我或傳上且去
笑爲節儉管家云七年擢都察院右副都御史提督
鴈門等關兼巡撫山西始至訟者二千餘人公令各
以情言不者梟而遣之遠邇肅然出路引若干下之
郡邑每引令入粟四斗得至千萬餘石宗藩缺歲
祿公奏以粟募人取鹽於河東運司正額外得鹽二
十萬引與商易芻粟以給邊令民以歲租折銀以給
宗藩人以爲便孟縣礦賊千餘人流剗村堡公檄鴈
門寧武兵合民兵捕之斬首二百級擒其首惡餘黨
悉降有欲以捷聞者公却之各關缺馬公市千三百

餘匹復請太僕寺馬三千分給軍士仍時應犒禁侵牟於是軍士欣躍復伍者二千餘人偏頭關西北二百里許曰草垛山有甘泉甚美虜恒恃以掠我遇警公令築之寧武城北山險虜每據之瞰我堅脆公益以雉堞又于沿邊坎地爲窖增於舊者十五虜知我有備邊患稍息居一年民隱吏治利害有當興革者輒疏言之其更將領裁冗官建學校諸疏俱報可九年召爲戶部右侍郎提督倉場明年監通州水兌陳六事十二年宣大二鎮奏虜且近邊命兼左僉都御史往督軍餉未幾先帝幸宣府又幸大同公

從十五騎先驅會計芻粟三晝夜冒險行六百餘里
抵懷仁是夜凡五嘔血且血淋下部公弗覺也以應
州之捷 賜蟒衣三襲旌一子錦衣衛百戶世襲公
辭且乞休不允十六年奉 懿旨迎 今上于新鄉

扈從至真定犒之羊酒至良鄉饋之盤飧 登極後

降 手勅進一品俸 賜彩幣二表裏白金三十兩

及人口以秩滿九載加俸二級尋進尚書仍總督倉

場嘉靖元年三月 上祀太學釋奠 先師孔子公

分獻東廡漕司故有折耗銀四十七萬餘兩以給殷

剝之資多爲典守者所侵公置綱司簿稽之以十一

月二十四日卒得年七十有二訃聞 命禮部請祭
者再工部管葬域

戶部尚書李瓚傳

實錄

戶部尚書李瓚山東濮州人登弘治丙辰進士歷刑部主事員外擢通政司叅議以忤逆瑾謫江西南饒州通判有平盜功瑾誅復故歷大理少卿僉都御史巡撫順天保定遷通政使掌鴻臚寺會朝議欲城白羊口以瓚爲副都御史經略邊關建鎮邊長峪二城以工部侍郎總理河道會礦盜起命瓚率兵剿平之改戶部侍郎總督倉場進本部尚書秩滿引年致仕嘉靖十一年正月卒其子侍郎廷相以計開 詔賜祭葬如例贈太子太保

資政大夫戶部尚書致仕贈太子少保諡莊簡

鄒公文盛神道碑

張 璠

吾荆江之上有耆碩曰鄒諱文盛字時鳴以戶部尚書致仕歲八年卒于家 上聞訃嗟悼遣官諭祭

賜之誥命 勅有司營兆域乃贈太子少保諡莊簡

曾祖諱仕旻祖諱渙考諱廉俱贈資政大夫戶部尚書祖妣胡氏妣易氏俱贈夫人從公貴也公少俊爽有大志稍長學尚書爲諸生文名崛起成化丙午薦于鄉弘治癸丑舉進士被簡爲吏科給事中卽侃侃有直氣已未奉 命覈兩廣邊儲以喪去服闋陞刑

科右給事中歷兵科左給事中戶科都給事中所疏
如崇儉約省課稅裁撫治及飭邊廣儲請設憲臣督
捕盜處番舶以通貨財鑿鑿切治體遼東守臣不戢
奉命往勘公據法按其罪又覈兩廣邊儲釐革奸弊
嶺表肅然時土官岑濟謀叛公謂叛起于激而成於
堂乃亟上處分狀竟阻閣未行諸謂公資望當得京
堂官以忤權貴乃出守保定公惓然就道至郡卽問
姦暴恤憚嫠有豪家爭一地上官數案不能直公直
之竟歸于民時逆瑾煽虐金吾爪牙之士往來境上
如虎而冠公一不爲禮或勸公盍毀方以避禍公曰

吾知守吾貞脫不免命也謹尋敗趨附者多罷官左
秩人方服公之見云辛未陞左參政督餉山東會劇
盜破州縣殺長吏我軍需餉甚急公謂發飛輓未嘗
匱乏癸酉陞福建布政甲戌轉雲南左轄其守臣俱
緣方貢索取無厭公抗不從守臣銜之乃摺摭細事
中傷公公持益力竟亦無他乙亥貴州諸酋不逞先
是巡撫以玩寇落職武皇帝命吏部就近推補公
時在雲南遂陞右副都御史巡撫貴州公至繕兵儲
糧不遺餘力時諸酋恃險來抗我兵乃復徵川湖土
兵征勦公下令曰是役惟爾衆盡相果殺惟命不迪

者有常刑令既下乃分兵進剿大破之斬首無算蠻
獍底定且嚴戢將士脅從罔治諸夷翕然歸之凱奏

武皇帝嘉悅賜勞璽書陞俸廕子公悉辭免庚辰
改南京都察院佐理院事辛巳 今上入承大統擢
公戶部右侍郎尋轉左國有大計多所贊襄甲申陞
南京都察院右都御史振揚風紀吏民股栗未幾陞
南京戶部尚書會畿輔歲飢廩藏空虚公憂之乃移
文督催諸逋繼屬載道士飽而廩漸充又奏覈羨餘
復水兌多見施行軍民德之丁亥滿考乃疏乞休
詔弗許特旨轉戶部仍再上疏未允乃北上考績有

寶鑑羊酒之賜自是入侍經筵陪祀分獻 上常賜

幣及御書皆渥恩也公益感激圖報凡四方水旱悉請于朝蠲租賑災恐後諸馬房敗隱冒破糧料公請官清查奸慝罔伏其議處鹽錢二法切中時宜至今稱便戊子秋引年乞骸骨者再 上命御醫診問遣

中官備物臨問時歸思堅不可回請益力乃得 旨

令乘傳歸役夫月米倍常格仍賜勅褒獎并寶鑑爲

道里費中外士類聞公勇退及 上渥恩無不人人

歎慕謂 今皇帝踐祚以來大臣之歸全終始于公

僅見公亦自以獲請所願訢訢焉樂而歸也歸且委

情林豁斷迹城府里中故有社公與梅莊方伯諸公
迺約爲會賦詩飲酒相娛樂爲文典則莊重有默菴
集奏議若干卷藏于家公體貌端凝玉立山峙歷官
三十年恭謹廉飭據法守正在公無懈志在家無惰
容君子謂公有古道云

太子少保戶部尚書贈太子太保梁公材諡端

肅傳

京學志

公名材字大用南京金吾右衛人幼岐嶷儼如成人甫受學輒慨然有經濟天下之志弘治己未登進士授德清令尅苦而勤敏一日勘事他邑重囚越獄去公還禱於城隍未幾就禽公問之曰汝旣遁何復爲我禽賊曰有一緋衣人尾之欲脫不能耳人咸以爲異正德二年晉刑部廣東司主事四年署貴州司員外郎獄小大無遁情大司寇洪公鍾每令諸司錄其獄案以爲法五年改山東道御史逆瑾誅榜諭天下

出公手筆大學士李公東陽見而絕愛之及爲史記
李公與楊公廷和各製一篇不愜意乃會司寇何公
鑑中丞楊公綸令其屬徧爲之李公見公作喜曰此
以古詞兼律筆足示後矣遂錄付史館六年出知嘉
興未幾調杭州杭以繁富名公至愈以清約自勵入
覲具一書二帕贊京貴橐中無一長物而公之廉幹
益有聞十一年進右叅政尋晉按察使會宸濠變起
濠去浙邇倚鎮守中人畢真爲內應人心洶洶御史
張縉謀於公曰事急矣將若之何公卽就案草檄調
兵方略布置一晷悉具又自往說真令撤兵衛白是

姦謀內阻兩浙恃以安嘉靖二年以服闋再爲雲南
按察使先是有土酋相讐夷者六載未定御史曰須
公爲之公卽召至諭以王法當殊死今姑貸汝如例
罰牛羊若干以贖土酋頓顙輸服御史難其太輕公
言治夷法如是足矣不爾是激之變也後詗知夷果
密調兵聞無他乃止三年晉貴州左布政使尋調廣
東凡入民課金令輸者自權之而親爲監督主藏者
不得高下其手往來傳置諸所餽遺卽果蔬弗受也
公兩典名郡及爲藩臬長壹以便民爲務頌聲載途
所至立專祠祀公六年晉右副都御史巡撫江西未

兩月召爲刑部左侍郎七年改戶部兼右僉都御史
總督雲貴川廣糧餉偕總制伍公往平雲南至澧州
聞捷還辭兼職冬晉尚書十年丁內艱十三年召復
任 駕謁山陵公受 勅偕宣城伯衛公鏞居守如

是者三十七年以考滿解職明年廷臣上議言司徒
乃國計大臣總領財賦得人實難竊見材操心廉直
終始不渝且綜理旣閑出納有執實清朝人才之望
及今未衰尚堪任使乞蚤召用以盡其材 上俞之
起公原官加太子少保公在位數令親信察市價低
昂攬戶不得乾沒所省官錢不可貲算永嘉張公新

貴用事常以意氣挫折公卿一日於朝堂厲聲語云
梁大用某處糧草當辦則應曰諾某處折銀當發復
應曰諾永嘉意其黯黯弗了也旣而偵之則無弗夙
具者乃歎曰渠固若是辦耶上念吏治龐雜特命
公以司徒行考察所汰簡者數百人人人大服又大
獄久不決者四事上命兼司寇讞勘之居數日盡
得其情擬奏上喜曰得尚書十二人如材者朕可
無憂矣事竣乃還印刑部皆以特旨從事前此未有
也平生爲國薦賢絕不欲人知是時士大夫頗尚圓
通波蕩浸淫莫知稅駕公卿或阿上取寵而公獨屹

然自守障隄末流反刃以樸卓然有古大臣風然竟
以此忤於時翊國公郭勛恃寵專擅損兵冒餉公疏
劾之上下其章所司警勛威莫敢詰復按勛不法
十事草成未上爲僚友泄其語反爲所中遂落職歸
歸兩月而卒嘉靖中工作大興邊費無藝加以水旱
癘疫所在告災公深用爲憂其經畫大端天下所藉
以安危者具載公奏議中文多不錄公於國計殫竭
心力而必不稍以加賦於民雖以此觸龍鱗躡虎尾
而公所澤於世者遠全於身者大矣在職力主節財
諸濫請浮費悉斥不應初世廟以禱祠故於額外

有所需公執曰終不以無益虧國計 世廟心弗善也頃之公去且死卒至邊儲大窘計無所出 世廟乃歎曰今梁材在當不至是其見思如此居恒約敕僚屬壹意奉公曰吾輩業委身朝廷終不復知有他矣自起家縣令至司徒處公廨者什九私居者什一終日高拱堂皇內外肅然在廣東一日右布政林富市肉數多召其僕誠勿過豐富聞之大怒短衣露頂踉蹌而出詈不已公頻視簿書端坐自如富慙而退自是人益敬憚之爲司徒語其屬曰若輩與人一接杯酒歡有干謁能竣却之平率之日坐部治事無敢

開出入坐傍置四書律例暇卽諷詠之以爲常以故
寅緣請寄悉格不行而歲計益以治公狷潔正直出
於天性佐食以園蔬絕無兼味公服用浙蕉極下者
底裏不厭澣綴唯兩裾鮮潔而已爲尚書宅憂歸始
有居室崔公銑稱之曰自公召還司徒塗人丐子相
語云今天眼開召回梁公矣此與司馬公入朝何異
西長安有屋一區予嫌其陋公至卽居之但掃地塗
壁而已予甚媿不及也卒之日家無餘貲子孫至不
能之京斬卹典隆慶初奉遺詔補給祭葬贈太子太
保謚端肅予祭四壇哀榮之典爲始備云

維風編

梁司徒公材平生清苦自持嚴於操檢爲杭州守郡
故以繁富稱於天下公練衣粗食屏斥華好泊如也
會入覲止有一書二帕以贄京貴橐中無一長物知
者詫之歷轉浙江按察方伯執法不撓時巡按御史
何越同里人也公以前輩不爲過禮何疑其易已積
不能平乃誣公十惡奏之銓曹察其非實量移雲南
公居之恬然不以爲介曰御史言果當卽譴次無恨
否則自有公論在矣綰藩篆時凡入課金輒令納戶
自稱而親爲監督主藏者不得高下其手凡往來傳

置諸所饋遺卽果疏弗受也旣爲戶部尚書夤緣請寄一切謝絕數令親信察市價低昂攬戶不得乾沒所省官錢不可貲算時相張永嘉新進寵倖常以意氣折辱公卿一日於朝會鴈聲語曰梁大用某處糧草當辦則應曰已喻曰某處折銀當發復應曰已喻張意初輕之謂其中黯黯弗了也卽而偵之則無弗夙具者曰渠固若是辦耶心欽焉公終日約斷所屬坐部治事不得私有出入卽郊廟大祀與歲節朝賀不廢退食之室于几榻恒置四書律例有間卽誦誦之以爲常公嘗曰秀才讀書做官不要錢是分內事

不可向人說況恃以驕人乎公平生爲國薦賢不欲人知曰恐來物議也公又嘗曰昔顏子犯而不校某敢當之云卽遇同里何御史事公言不虛也可以爲難矣

廣東通志

梁材字大用順天大城人係南京金吾尺籍弘治己未進士志尚節齋能甘澹泊歷仕考語皆以儉樸因自號儉菴云嘉靖四年來爲左布政使靖獄市嚴門禁凡同僚及首領皆置同牌書其僕隸令候缺吏輪通每市物必書其數粘牌上會而後召市人人毋壅

面領價銀日以爲常雖不苛細然胥隸皆熟記
憶闌出財物無不知者一日右布政使林富市肉數
多召其僕誠勿過豐富聞之大怒褰衣小帽出而踉
蹌詈罵不已材端坐自如賴視簿書富慙而退自是
官吏益敬憚之帑藏出納贏餘一介不取吏宅聯坐
至成巷陌巡覈閑雜皆屏且責內外肅然旦夕皆飯
于堂上侑以青菜或冬瓜蘿蔔惟一味比擢副都御
史巡撫江右薦紳皆餞諸大觀橋解衣盡歡痛飲大
嚼始知其節嗇乃習慣成自然爾視所服圓領用浙
蕉極下者裏服布素澣補惟兩裾鮮潔離廣基月連

陟戸部尚書慎制 國用得罪罷歸卒

戶部尚書蒲汀李公廷相傳

李開先

國初抵今山東賜進士及第者總七人韓克忠馬愉以狀元王恕開盛以第二名張天瑞王勅李廷相以第三名獨李官至八座情者猶以爲未登三台以其所施未盡所養也公自號蒲汀友字之曰夢弼父命其名曰廷相姓李氏乃文定公之裔世爲山東濮州人高祖義洪武中以人材被徵將授官力辭之因充錦衣校尉遂寓京師曾祖俊祖賢俱贈資政大夫戶部尚書父瓚曾取中進士第三名因讓會元陳淵移置二甲而公乃補之亦天道也父歷任戶部尚書未

尚書之前家人夢有報者戶部正堂爺做後小相公
當繼之後果如夢非偶也母一品夫人趙氏以成化
辛丑五月二十二日生公穎異秀拔其天性也該博
貫通則其學力爾初遊順天府庠歲試屢冠多士年
二十一舉弘治辛酉鄉試第六次年授翰林院編修
簡入內書堂教書正德初逆豎劉瑾盜弄威權傾族
名士在翰林者多謂六曹公爲兵部武選主事陞武
庫員外職方郎中時邊務方殷警報踵至題覆章疏
月無虛日公從容酬應悉中機宜瑾嘗先示風言款
用一將官公以輿論弗協持之甚力瑾怒將中以危

法堅不之顧值其小過亦無可乘旁觀者爲之寒心
幸而保全三年給由大家宰楊逵蒼考上許以任重
致遠理則仍復原職陞右春坊右中允兼修撰積六
年始陞侍講學士今有不數年卽爲講讀者公嘗言
久任乃官人之法吾在史館十八年始得展書近來
寢失古意矣公雖文墨是司日惟講求世務刑名錢
穀皆所不遺五典文衡其得士最盛乙丑辛未甲戌
同考會試而丙子庚辰則主考鄉會兩試也嘉靖乙
酉陞南京吏部右侍郎戊子引疾辛卯詔起之壬辰
值父母連喪服闋改兵部右侍郎知武舉未幾陞本

部左改禮部亦左充經筵日講官丁酉陞戶部尚書
總督倉場兼提督西苑農事人止知公以老侍從長
于文學而不知尤長于政理倉務百凡有條而一無
所失吏畏之官服之奏舉漕運倉場利弊八事多見
之行戊戌以廷推導總部事兼翰林院學士經營國
計籌運邊儲殫心畢力守法奉公權貴請託拒不得
已又加太子賓客乃以微疾乞休臺諫交薦奉 旨
起用將處以南禮部 聖心眷注以爲補南是外之
也將大用之而公不待矣計聞 上俯念顯功旁采
羣議特贈太子太保謚文敏其爲講官方將進講也

武宗乃退而遊于西苑次日五鼓始御經筵衆以其
久候力倦或不逮往日及開講聲音洪亮理致詳明
上倚聽大喜卽欲傳勅取入內閣辦事都督朱寧
朱安等各有賀禮及門公以講書乃職分之事雖頗
稱旨非他有積勞豈可以常事而當盛寵因數言而
取相位耶辭之甚懇未允不得已從權偕左右貂璫
之力始得僉音乃後門人如張羅峰翟石門嚴介溪
而夏桂洲則又門人之門人也皆爲內閣大臣而公
竟不與焉所親有尤之者曰恒言謂百年到手是功
名當時如不固辭雖如五日京兆亦可也此豈士君

子持身之道公之確守緩待爲是也

戶部尚書王公果

王果字景初汶上人舉正德甲戌進士授臨汾知縣
威信大行治行爲山西第一徵補江西道監察御史
巡視陝西茶馬會歲大侵詔遣二中貴人分守蘭
靖果卽上言窮邊饑歲民方救死不贍若額外設官
勢必增派民將重困乞取回內廷供掃除職庶合

祖宗官制總兵趙文貪墨恇怯盜糧敗劄私結佞倖
魏彬爲內援累經論劾皆寢不治果因列文所化皆
有狀彬附下罔上害治匪細乞併論如法以章國典
文竟罷鎮奉命巡按蘇松江南大饑多方賑貸民

賴以全入掌河南道協贊考察公行汰黜無所承望
凡所建白皆闕治體而不振拾短長以事搏擊癸巳
陞太僕寺少卿乙未轉大理寺右少卿丙申陞都察
院右僉都御史協理院事己亥歷左副都御史戶部
右侍郎河南大饑奏發帑銀卽民所聚量口給食
全活不可勝計辛丑陞右都御史督漕于淮緣河苦
災民多輕徙蕩滌煩苛噢咻而賑貸之入爲戶部尚
書夙便審畫乃折兌米開事例括積羨責宿逋理屯
鹽取贓贖悉心畢議率掣鑿可行不加賦而事辦丁
未再考加太子少保會有詔買龍涎香久而未獲

忘者因以中之逮下詔獄請戍雷州卒於貶所臨廣
丁卯都給事中辛自脩等交章白其寃狀 諭祭四
壇遣官治葬贈太子太保

戶部尚書克齋王公諱傳

許彥忠

公諱傳字克明別號克齋其先太原人自南渡遂家
何容高祖蒙吉曾祖廡世有隱德弗仕祖父升父槐
皆以公貴贈資政大夫都察院右都御史大母湯氏
母張氏俱贈夫人公稟異質狀貌魁梧舞象時業不
類恒兒贈公教之誦詩七歲授孝經小學卽欣欣動
引古人自期稍長讀書朗然貫通第其家素貧贈公
拮据朝夕弗贍嘗嘆曰安得吾兒有代勞者公聞之
竦然獨念諸弟稚無可擔負乃釋書史代贈公經營
什一暇則手一編不置時或臨水顧其影嘆曰天生

子而使之久居人下耶見者以此覘其遠到邑有賤
更役賄公例當解藥材于京師公請代行比至會校
士南宮同邸一孝廉試出錄其文示公公笑曰吾力
能辨此榜開孝廉得雋公復笑曰進士非異人任遂
歲於都門曰不會試不入此門其勵志如此歸乃獨
居一樓下帷發憤謝絕一切陳夫人朝夕饋食置樓
外卽返公徐自取食不親授也每讀至午夜聲猶煇
煇雞鳴復起誦如初就試有司輒冠多士督學菴山
張公最慎許可得公卷大器之已舉正德丙子鄉薦
脩計至都門昔所題議宛然是年應登進士第觀政

時以公事謫內閣新公與之談時務因奇之曰此大
受器也遂授吉安府推官公蒞任訓吏弊獄多
所平反以仁恕稱時寧藩叛逆陽明先生檄公統一
旅抗賊有愛公者曰太夫人在恐驚之盡辭公責之
曰吾輩食人食官以賊遺君父耶脫人人效此逆將
誰討於是披堅執銳親冒矢石爲將士先嘗令一吏
督戰賊至期不見一艘公卽以軍法斬其人衆皆駭
異陽明先生獨嘉公膽略曰士貴識時務如王君可
謂達權矣嗣是與叅密謀兵攻南昌城破賴兵殺僂
太甚公亟稟陽明先生止之陽明先生令繫之獄皆

滿數日疫癘大作公復稟於陽明先生陽明先生命
公釋之而衆軍皆譁遂縛公詣軍門陽明先生時獨
立見公至大怒曰此我意也刑其爲首者數人公始
得解公之所活不啻千萬人矣是時公運籌之力居
多以故陽明先生奏捷疏臚列公名有首從義師爭
赴國難協謀併力共收全功等語 武皇帝時正舉
告 廟飲至禮敘擒宸濠功公當與伍文定諸公聯
行而張太夫人訃音至矣公居喪哀毀骨立與世疎
闊卽燕中諸貴人絕不相聞問諸貴人咸側目公及
服闋論功僅僅加兩級補南京大理寺右寺副後轉

左公以明允佐其長民自以不究時議大懼公隨楊廷和等伏闕泣爭杖於廷絕而復甦曾不少挫其志尋陞江西按察使司僉事分巡湖東公悉心撫字屹然保障一方未嘗以苛細毛摘問語僚屬曰民無知易犯法吾輩當於灰中求生廬陵有父子三人白晝搶奪者邑令周某俱以灰擬公察其事法不至灰議從末減令斷斷作喉語曰此直指意公曰殺人以媚人可乎及讞審公力辨其冤直指是公議遂累疏薦公才陝西商人以販錦至臨江忤權貴家值地方捕盜商隨衆聚觀因并逮焉不勝拷楚商乃訴服經十

餘年未決公曰焉有人俊偉如此而爲盜者移文覈其年月并召居停者詳訊廉得實遂釋之仍給引護其行由是公名大震諸郡邑咸感德爾威以青天頌矣載攝學政課藝文一以理爲主浮誕者必黜以故一時所得盡知名士尋陞南京光祿寺少卿改光祿寺少卿陞太僕寺少卿隨陞南京太常寺卿久之陞都察院右副都御史巡撫江西江西故公舊遊地吏治民風公悉周知又得侍御韓峰沈公來按其地兩人同心肅慎以立綱振紀爲任一時墨吏望風解綬者甚衆以東官恩贈大父父如其官大母母俱淑

人蔭子誠國子生公念句容朱家巷載在 御製

孝陵碑遺趾凡存以未爲表識樵牧無禁上疏請建
陵護塚廣尊祖敬宗至意疏下所司會勘廷議遣南
京禮部侍郎崔銑同撫按題學御史共詣其地會有
尼其事者因寢不行陞南京戶部右侍郎改戶部右
侍郎尋轉左陞都察院右都御史總督漕運兼巡撫
鳳陽等處歲轉東南百萬之粟以實邊儲諸敝竇埽
除一清如贛海州之馬課裁揚州之二關載於史籍
入尤便之晉陞戶部尚書總督倉場督理西苑農事
公領大司農董人爲出歲有恒度一切漏卮毫無所

客有近戚以玉帶黃金賂公爲請莊田計公峻却之
往倉塲曉發易雜泥沙公覺以瓦石至今永賴大都
留心國計事無鉅細必求石畫以故太倉陳陳相因
厥功懋已匹何偽銀事覺逢主上震怒杖公於廷
且削籍以歸事起卽郎中余善繼檠收兩淮解銀未
及詳嚴尚書王果御史艾朴皆得罪頃之以言者復
波及公公論寬之公絕口不辯卽日單騎趨里日淮
園于城南歲時伏臘與二三昆弟皆微時交詩筒酒
杯徜徉自適或携杖東阜課耕織共野叟話桑麻青
刺署名輒偶老農無意世事矣然聞四方利害時政

闕失未嘗不拊几扼腕也議者方望公再起爲天下
禍而遽以疾逝惜哉公敏歷中外三十餘年皆循資
而進非分美事不錯半趾剛腸嫉惡尤出天性論事
必先別是非交友必先別君子小人有善樂道之如
已出有過而斥之不少假其招謗取忌率由此立朝
時相言暨嵩皆推重公而公持已有度有不可待而
親踈者兩人亦不能有加于公也居恒篤于孝友視
兄弟子爲已子婚娶教督各爲之成就拳拳以忠厚
廉介爲諭一言一動可垂世範性無他好獨嗜書因
構樓貯之額曰藏書山房時時展卷伊吾老而靡倦

書法蒼鬱得山谷筆意所爲傳記雄渾精嚴詩律卑
宗韋李中肆力少陵晚更喜陶孟曰取其夷曠契我
懷也奏議力追賈陸雅不欲以此顯名奏卽焚草不
傳僅克齊集二卷行于世余反覆公之生平無論平
藩庸功著於社稷議禮侃論凜千秋霜崇本一疏留
心豐鎬其偉烈忠謀可稱一代殊絕人物卽撫豫章
清淮南兩秉節鉞位躋八座率可膏肓自潤而公卒
之日家無餘貲止遺屋數楹僅蔽風雨子孫至不能
供饘粥其清白之操寧不足以風百世哉公殉後
穆皇御極 詔訪大禮大獄已故大臣當 恩卹者

學臣少詹周公疏公名與司寇顧公璉等一體請卹
格而未行夫公與尚書王公果同時受枉果已昭雪
而尚未及公異日當有嘉公大節繼周而上請者

大司農克齋王公碑傳

澹園集

句曲司農王公其古所稱大臣者歟大臣者無苟交
無詘節見一善亟惟揚之恐後語保子孫黎民者必
歸之如公是已金陵劉省齋都督以清節古道重一
時公與同官豫章聞其與臺察議論侃侃不阿心壯
之已同河漕見其力抗權姦矢必爲漕卒衛蓋解之
不容口云嗟乎此古人之風非近世所宜有也余生
晚不獲親炙其人就所知者爲之傳志嚮往焉公諱
暉字克明別號克齋其先太原人自宋南渡家句容
高祖蒙古曾祖庸世有隱德祖升父槐皆以公貴贈

資政大夫都察院右都御史大母湯氏母張氏俱贈
夫人公狀貌魁梧舞象時不類恒兒七歲授孝經小
學卽動引古人自期稍長讀書朗然貫徹第家赤貧
贈公爲朝夕虞嘆曰安得兒輩有代勞者乎公聞之
竦然獨念諸弟稚無可擔負者乃釋書冊代贈公營
什一以給暇則手一編不置時時顧影嘆曰天生予
而使之久居人下耶邑有踐更役贈公側當解藥材
于京公請代行比至會校士南宮同邸一孝廉錄其
試文示公公笑曰吾力能辦此頃之榜出而孝廉得
雋矣公奮曰吾異日不以此起家者有如日輒自書

邱舍間其屬志如此歸獨居一樓謝絕一切陳夫人
饋食置樓之城卽返不親校也每至午夜誦聲煥煥
屬詞則自發其藻不繇師指而每試輒冠督學鰲山
張公得公卷大器之已舉正德丙子鄉薦偕計至都
門觀所題識宛然是年聯登進士第以事謁內閣靳
公與之揚扅世務甚畏服之曰此失受材也授吉安
府推官人或以筮仕難公乃精心平亭之更以得上
下心時宸濠逆節大著陽明先生倡義討之檄公以
一旅助有愛公者曰得無爲太夫人憂公讓之曰吾
敢以賊遺君父耶脫人人效此賊將誰誅於是親冒

矢石爲將卒先嘗令一吏督戰艦及期無一艘至以
軍興法立斬以徇驟見者賊甚陽明先生大嘉公曰
如王君可謂達權矣嗣是與參密謀兵攻南昌城破
賴兵殺僂適當公亟稟陽明先生止之先生令繫之
獄數日疫癘作公復稟先生釋之一軍皆譁先生亟
曰此我意也蓋一言而公之所活不啻千萬人矣先
生念公運籌功奏捷疏臚列公名有首從義師爭赴
國難協謀併力共收全功語 武皇帝時舉告 廟
飲至禮叙功公當與伍文定埒而太夫人計至卽首
杖就途不反顧時朝議方詘新建功自文定而下特

爲稽故以難之陽明妻請不應公諭公除僮僮加二
級補大理寺左寺副大禮議起公隨楊公廷和等伏
闕泣爭至禍天怒杖於廷不爲悔尋陞江西按察
僉事分巡湖東公精於法比時時以情衆三尺而行
庭陵有父子三人劫人而奪之金者邑令周業置
大辟公曰此爲饑所驅耳而閭閻坐死可乎令曰此
直指意公曰殺人以媚人吾不爲也陝商以販錦至
臨江忤貴家值地方捕盜商隨衆往觀因并逮焉不
勝榜掠遂誣服經十餘年未決公曰焉有偉丈夫如
此而爲盜者移文覈其年月并召居停者一訊得其

實釋之由是公名大噪於郡邑中矣攝學政課藝以
聖為主浮誕者黜故一時所得多知名士尋陞南光
祿寺少卿改光祿寺少卿正品式裁侵漁多見采納
陞太僕寺少卿 上方有事山陵公能叙卒應辦事
集而下不擾 上甚嘉之會考績推恩制詞云剛方
之守強于自立通敏之才優于幹理蓋實錄也陞南
太常寺卿亡何陞都察院右副都御史巡撫江西江
西故公舊遊深曉民間疾苦與其吏敝又得侍御韓
峰沈公來按其地兩人同心以立綱振紀爲任一時
黃紱而下有望風解印綬者以 東宮恩贈大父父

如公官大母母俱贈淑人樛子誠國子生公念勿容
朱家巷爲祖宗所自出故 御製孝陵碑未經表識
樵牧莫禁上疏請建陵置守卒廣尊祖敬宗至意延
議遣南禮侍崔銑同撫按提學御史請其地介於有
它之者事竟寢陞南戶部右侍郎改戶部右侍郎尋
轉左奉 命攝其部兼會 廷議禦房事宜公與兵
書毛公伯溫悉心講求斟酌阻法務經久可行不以
一時便宜傷 國計會有言官語侵之公引咎乞歸
奉 旨勉留陞都察院右都御史總督漕運兼巡撫
鳳陽等處至則夙敝盡掃歲綱如期無後者其贊海

州之馬課裁揚州之二關人尤便之 太廟成 詔
進階資政大夫贈祖考皆如其秩祖母以下贈封夫
人晉陞戶部尚書總督倉場督理西苑農事公所治
公儲務在按伏匿章冗濫吏不得侵牟爲姦有感曉
以玉帶黃金鐲爲請莊田地公峻却之往倉場臘殺
率雜泥沙公楚以磚石冀爲永利 上聞而嘉之賜
大紅紵絲四表裏緞金獅補等又賜 獻皇帝御書
文行忠信四篆字以示旌異亡何仍銀事起先是部
郎中余善繼舉牧兩淮解銀未及殿尚書王呆御史
艾朴皆廷杖戍邊去科臣周汝達語復校公 上并

杖公於廷且削籍以歸是時相言與蒿平意忤甚
汝進窺言旨引繩批根欲因以撼蒿公無與也頃之
上悟杖汝進幾死而遠謫之意亦若以兩解云公置
不辯卽日單騎燈里日灌園城南茂時伏暇二三昆
弟暨微時交詩筒酒杯徜徉自適或携杖東阜課耕
織話桑麻而已絕口不言仕途事然聞四方利害時
政闕失未嘗不拊几扼腕也識者方望公再起爲天
下福而遽以疾逝惜哉公性廉靖鮮衒飾以慕人耳
目而中實凜不可犯請謁者望風屏跡無識不識皆
憚服數歷中外三十年循資而進非分事不錯半跣

剛腸嫉惡不能自禁論事必先別是非交友必先別
君子小人見善如不及有過面折之不少假其取忌
率由此立朝時二權臣皆賢重公欲引以自助而公
持已有度有不可得而親疎者科臣不知也居恒孝
友篤摯視兄弟子爲己子婚娶教督務底成就取古
忠厚廉正事嘗說之足垂世範世味一切無所好
顧獨好書構樓貯之額曰藏書山房雖老持一卷不
廢書法得山谷筆意所爲文雄渾精嚴詩律汎濫於
草李少陵晚唐陶孟曰取其夷曠契我心也奏議繁
夥可行不爲藻飾語書多矣其草僅存齊集二卷

行于世 隆慶初理議禮諸臣當 恩卹者學臣周
公弘祖疏公名與司寇顧公璉一體請卹格而未行
夫公與尚書王公杲同時見枉杲旣昭雪而未及公
與日當有重公大節繼周而上請者

論曰余鄉率推公爲殊絕人物謂其清節罕儔也夫
公開府二方致位九列而敝屋數椽不蔽風雨距今
甫百年遂無以爲家其許與劉公非其臭味然邪顏
公義色昌言動關世道視險如夷不阻不渝非直養
無害者不能詎僅僅以廉靖稱而已余懼世漸久而
知者鮮特詳著之今尚論者知循其本云

戶部尚書李公如圭傳

胡直

李如圭澧州人幼抱鉅人志工文學弘治己未進士授江西安福令首擒豪俠數輩寘諸法邑中肅然調建安時華林盜賊充斥乃陰設間殲其渠魁居民安堵入爲御史正德壬申按福建貪酷吏望風宵遁尋丁內艱終制不起者十餘年巡按何鑑薦其才復起廣西兵備副使陞陝西按察使未之任擢都察院右僉都御史會延綏大飢廷議賑濟薦圭才堪任乃列疏荒政十餘事請得便宜行事上可其奏至則問疾苦嚴法戒大布賑濟之策全活數萬人感惠立

祠祀之事竣總理河道多方疏濬易置閘座修固堤岸引諸湖水接濟河流由是糧運無阻黃河徙決爲患最大要在疏導淤塞爲先戒飭沿河州縣依法造舟用鐵扒尖鋤駕舟順流隨方濬之故水得其道無衝決患進兵部右侍郎改吏部尋陞戶部尚書時逆胡犯邊國臣告急乃度其緩急先後疏請以次解發帑金庾粟無慮數十萬軍餉賴焉嘗書弘濟艱難四大字以自勵以不善事權嘉靖壬寅致仕乙巳卒

戶部尚書方公鈍紀言

維風編

方司徒公鈍常分宜柄國時寵賂滋章天下仕宦靡然顧化卽下之薄俸丞尉無不賄其里之尊貴人以徼庇植而望之尊貴人亦多以是爲餌若輩計者公見里中此輩以竿牘通者輒峻却之其人或固以請曰此具薄俸非取諸民也公則應容曰汝俸幾何俯仰攸賴奈何推以遺我王法可畏民生可念汝不能其官我不能爲汝庇遺我何爲或復曲爲詞曰此書一帙耳公則又曰余一自入任所習惟一大明律耳何暇讀它書書積不讀而徒以累他日歸途大役大

非陰德事也竟片札不受里中癡子反有以爲憾者
余初魁南宮時謁公余請拜公抗顏曰勿拜余乃揖
命予坐時有郎差臨清者先在座公若不禮余者第
顧郎諄諄誨之嘗舉廢曰往聞薦紳過此者必具豐
餼華無今民窮極矣如此皆民膏脂非我所藉以奉
人面皮者但遇相知風染一飯相延道故而心自是
款洽奈何如此予初覩公遇予若甚倨乃聽其語戢
戢有味于中不欲辭去已郎官別去仍一語不及予
予起更端請曰小子起家蓬茅願領教公厲聲曰爾
云蓬茅誰從母胎中卽成進士耶予惶恐不敢再更

端請起開公送之門屏間謂余曰子卽日廷試矣
上發策必有所欲言汝對中丞言敬天惟在愛民親
賢當先遠奸謹識之毋洩余乃揖謝教而出公嘗謂
新進者云作官無他言作到老學到老是矣嗣觀政
時公數數召同鄉中士紳飲序以齒列不論官座中
常有進士以齒加於京堂上者其嘗惡草而情固款
洽也常訊諸進士曰汝輩幾人一寓幾人一隸也大
都所言皆前輩時事時套若勿聞者余初第時猶一
及見此等風致今亡矣夫

戶部尚書張潤傳

嘉靖三十三年二月丁酉贈故戶部尚書督理西苑
農事張潤太子少保謚恭肅昭祭葬如例潤山西臨
汾縣人弘治十五年進士授河南宜陽知縣遷給事
中陞順天府丞都察院左僉都御史巡撫順天寧夏
仍回院管事九年秩滿陞副都御史坐大獄罷歸十
年餘以言者薦召復原職陞兵部侍郎工部尚書
丁憂服闋召起爲戶部不赴以疾乞致仕許之未
幾卒年八十餘潤端雅有度居官一志奉公所至有
聲績而剛正自持屢跡不變其德宇恂恂恭讓好禮

鄉人至今稱之

資政大夫戶部尚書贈太子少保熊村賈公廕

春神道碑

潘恩

戶部尚書贈太子少保熊村賈公諱應春字東陽熊村其別號也世爲真定府真定縣人正德己卯中順天鄉舉嘉靖癸未登進士第授河南南陽縣令縣當南北孔道衝劇莫加又藩封在邦域中軍民雜揉衆右玩法難治公威惠互用境內肅清秩滿擢知和州州事具舉拜南京刑部員外郎擢本部郎中盡心獄斷明威著聲尋改刑部郎中拜知山西潞安府踰年改開封己亥春聖天子幸承天過汴宮路者檄公

綜理諸務區畫詳審綱舉目張服其敏無何擢陝西
按察司副使會河南巡按摺樞流議劾公勘報失實
言者被謫併逮公左遷山東鹽運司同知俄遷知漢
陽府丁未進復陝中憲副以直前誣戊申擢布政司
右叅政寧羌賊起地方騷騷撫按檄公視師應待底
定事聞 上嘉之有幣帛之賜已酉擢本省按察使
庚戌擢右布政使進左布政使法紀風行保釐政舉
辛亥拜都察院右副都御史巡撫關中公繕兵積儲
擴外安內全陝之望不孤癸丑加兵部右侍郎兼右
僉都御史總督三邊軍務時虜酋俺答甚強其

弟若子把都台吉吉能尤稱桀驁分部黨落散處海
邊逐水草移徙河套亾常歲爲邊患又大同人丘富
者狡獪之魁桀也負罪中國叛去降虜教其黨乘秋
寇邊合騎採獵禾稼攻犯堡寨雲龍應朔諸州亟懼
其害時關陝亦有震隤之虞公夙夜惕勵罄心殫謀
防禦備至是年六月虜大舉寇鄆延公普師率旅衝
擊斬首二百三十級獲馬駝千四百餘夷器倍是醜
類大劬功最捷聞廕一子國子生八月虜復入寇迎
戰牛營斬首百二十級十月寇神木堡斬首三十級
甘肅龍溝腦斬番賊首十級十一月山丹斬虜首三

十級捷聞賞白金四十兩紵絲三表裏十二月三原
涇陽捕獲奸細六人甲寅正月延綏斬虜首四十級
二月賀蘭山斬首三級路州捕奸細一人六月石硤
口斬番賊首三級八月濫泥溝斬虜首四十級捕虜
一人降虜二十八人斬番賊首五十級是月虜復寇
紅井斬首一百四十級功最是歲奏捷者三 上賜
銀幣若前有差尋擢本部左侍郎仍兼院職總督宣
大軍務未行奉 旨仍舊總三邊會三品考績復舊
一子國子生贈祖瑄封父隆如公官贈祖妣王氏封
母李氏俱淑人乙卯正月虜番並犯甘肅公布旅迎

敵斬虜首三十級捕虜一人招降虜十七人斬番賊
首六十級延綏石溝墩斬虜首九十級復有銀幣之
賜二月興武營斬虜首三十級延綏斬首二十級四
月涼永斬首二十級斬番賊首三級階州捕獲番賊
一人五月歸德口斬虜首三十級十二月杏樹梁斬
首八級涼馬營斬首五級沙河川斬首八級葭州捕
獲奸細四人是年加右都御史兼兵部右侍郎仍舊
總督丁巳正月虜大舉寇延綏斬首一百十餘級獲
馬駝夷器不可勝數功最復廕一子國子生公在陝
數年兵戎整揚自寧夏至武修築邊牆一萬一千八

百餘丈 上有白金之賜仍加俸一級是歲拜南京
戶部尚書尋改刑部尚書未幾改戶部尚書考覈章
程勾稽贏縮 國計賴焉戊午夏四月二品考績
上遣中官賜以寶鏤羊酒晉階資政大夫加封祖若
父俱尚書祖妣暨母俱夫人時公以疾上疏得 旨
致政歸二親壽皆踰耄公承懽膝下愉愉如也居無
何疾復作不起訃 聞贈太子少保

戶部尚書諡恭簡耿公定向傳 京學志

公諱定向字在倫湖廣黃安人嘉靖丙辰進士少倩友生講業卽以興起絕學爲已任及登第擢監察御史時冢宰吳鵬與分宜比濁亂銓政公抗疏論罷之分宜奪氣按開西所薦舉後多爲名卿者行李蕭然二筇或餽以石經慮疲役夫卒留之境上作留經記壬戌改督南畿學不以青紫業薄待諸生而訪進以古學留都固多好修特起士公首得數輩以正學印之當其忘言默證灑然一笑不帝曾唯顏喟二程之吟弄以歸也有馴行異等者拔之儕伍中檄有司禮

聘入試里巷小民訓以 聖諭六條而謂童子虛明
當養以正至社學師不難拜而敦遣之故自膠庠以
達里塾家誦戶弦彬彬比於鄒魯矣輅車所至十四
郡隨亦興起乃構崇正書院延四方來學之士而郡
邑茂異亦時召就學以陶鑄之蓋公爲國作人冀善
人多而天下治其用心如此生平愛惜人才獎拔善
類每投揭政府錄用之人無知者嘗幼新鄭相編狹
乏大臣度新鄭相以此憾公以大理丞謫州判新鄭
罷薦起累遷至同寺少卿陞都察院右僉都御史丁
內艱去而是時江陵以學情起復與朝士構丁公漸

異矣及服闋薦用特出公巡撫福建公寓書諷其退
諸諫臣不能用會公復丁外艱去江陵尋敗臺省文
薦補都察院協理分都御史晉左副尋轉刑部侍郎
陞南京都察院右都御史申臺規救三撫臣抑新進
風聞彈事者朝論避之陞戶部尚書總督倉場入疏
乞骸予告歸家居七年卒年七十三贈太子少保謚
恭簡所著有庸言奏疏牘草應迹碩輔實鑑先進遺
風數學商求小學新編問訓禮纂收要編譯異編儒
宗傳大事譯學彙觀生紀等書行於世學者稱天臺
先生 國朝自新建後談學者徧海內而或參以意

見或蕩於情慾皆影響良知與新建監公憂其牧也
嘗謂學先志以悟而入以修而證又謂學有三關四
證語具在集中晚年力疾答郭方伯書幾萬言大旨
謂孔子之立達大傳無盡所謂賢于堯舜者此也孟
子願學孔子以子弟從之孝弟忠信爲勲庸以距詖
放淫爲天吏之征討以守道待後爲創垂之統業可
謂爲巫囿不爲矢匠而善於擇術者故公平生伋伋
不厭不倦在朝在野無一日不與朋友相切磋兄弟
門人無一語不以學問相究竟由越中以進之汴泗
卒澤於道德醇如也公既死遠近同志皆爲位以哭

國都既祀之名宦復建專祠武勝橋西南諸生以時
瞻拜宇下至低回不能去云

光祿大夫太子太保戶部尚書贈少保兼太子

太傅楊公俊民墓志

王家屏

國家經費大司農定額之異時承平寓內少事出入
壹準於額得以不訕爲虞隆萬以來邊報內供數十
倍故額頃年兵事數起益以大禮大工助賑諸費復
皆額所不載者司農之難誠莫難於今日已少保楊
公適承其敝用詎勉調度伸詘爲艱 天子特加重
焉嘗曰戶部不可一日無楊尚書而時時六卿虛席
者半則又數詔公兼攝其事衆不能無忌公亦坐是
積勞致悴病矣一日視事畢忽眩仆地 上遣中使

臨問賜以牢醴蔬餐於其乞休也復 溫旨慰留之
乃竟不起計聞 上輟朝一日賜祭九壇首命大宗
伯將事邸第仍遣符卿某營兆域行人某護其喪歸
贈少保已敘東征轉糧加贈兼太子太傅並給之誥
命稱異數云公諱州民登第更名俊民字伯章號本
菴系出弘農華陰徙居蒲自國初諱善甫者始高祖
諱配張曾祖選配趙李祖四川僉憲瞻配田並以襄
毅公貴累贈光祿大夫柱國少師兼太子太師吏部
尚書而配皆一品夫人父襄毅公博加贈特進左柱
國太師母段加贈一品太夫人則以公故公生而英

特不羣童時從大父宦蜀偶閱鄉書志奮攻舉子業
不二年文藻勃發遂以儒士試省闈有聲嘉靖壬子
與計偕壬戌舉禮部第四人登進士授戶部主事值
虜薄都城公受廩廩士之守陴者拊勉之士皆踴踊
人以是覘其能尋調禮部歷主客郎有 詔賜戚里
黃門趣公宣給公曰此內賜也宜於迎和門頒之非
禮官所得與 上聞之是其言隆慶戊辰督學河南
敦厲風教嘗刻二程全書置贍學田祀鄉先哲忠義
節烈者士斌斌興起轉本省參政用法寬平偷三刺
論以憐其壯有母出之他所予生比尤衆顧操豪右

獨嚴大帥有暴里中者憚公屏蹟時新鄭當國而駟
陵劉生者新鄭甥也傲不受課倍扶之除其名又其
兄中丞公揭有司請祀於鄉公惡其手刃一子弗許
用是失新鄭懽久弗調今 上踐祚元年徵入爲太
僕少卿其冬襄毅公以疾謝政公請得扶侍歸里居
一歲丁襄毅公憂服除起補原官轉太常少卿戊寅
轉大理尋擢都察院僉都御史撫治鄖陽辛巳進副
都御史移鎮山東壬午 皇子生於一子國子生其
年陞兵部右侍郎丁母憂去乙酉起戶部右侍郎兼
僉都御史督理漕河巡撫鳳陽凡三歷重鎮所至斥

食殘損徭賦實戶口諸兵戎諸所興除務計地方之
便所不便者卽詔條目下一切停開忤忤地弗顧也
撫卹二年積羨八萬五千餘金適議罷卹撫類條
後七事防之東土閒田請輕其租聽民自占墾期以
數年易草萊爲沃壤其督漕也瓜洲並江棄地開港
一曲紆回數里以便停泊遺策至今遵用焉丙戌選
部丁亥改兵部左署部事會議虜王嗣封公言款未
可遽罷惟內修守備而外勒西虜使盡還巢中定市
類使無溢索溢索而罷未晚也議遂決戊子壽官成
以督役勞陞正二品俸賜一品麒麟服己丑協理京

營念營兵驕情請選三大營備兵充總協標下令足
三千人以資彈壓報可是冬陞戶部尚書總督倉場
庚寅秋還部視事公之入部也首言萬曆六年所增
內供銀二十萬宜停取邊餉自四十萬今增至二百
八十餘萬宜損裁且請大集廷臣雜議理財之法議
未定而寧夏卒戕上帥叛有言其勾虜征薄瀟關者
公策叛卒嬰城自守必不敢離窟穴木兵恒擾弗聽
也驟請發大兵討之輸將未半而朝鮮中倭患告急
復請發大師東矣當是時東西用兵各數百萬人
糈迫於星火前後徵調七千餘各散百十萬其不足

者議增監策議拜爵免罪議勸輸議借漕糧議轉山東粟所以補苴之百方僅僅得無乏絕乃 皇長子出講長公主婚 仁聖皇太后喪兩宮災助工作皆有費費皆不貲而河工織造協濟諸費不與焉無一不仰給於公者甲午中州大侵人相食公條議蠲賑事宜甚具所發帑庾銀粟各數十餘萬而言者猶抵公稍延公言積穀備荒本有司事乃虛文無實勅倚太倉太倉之蓄幾何因自劾拯救無奇乞罷 上優詔褒慰時帑庾經耗九邊年例益誦而求增無已公請勅各督撫嚴核冒破侵剋之弊共圖裁省而內庭

非時之索若增取澳金及趣辦鋪宮珠寶等費每歲
事匡救力勸上以樽節要歸於去其害財者以爲
生財之術而臺省諸臣乃數言礦利公曰礦非無少
利但不勝其害耳則屢疏發難排之以故其事寢無
何奸弁獻諛以濟大工爲名合上意而從中復有
陰持之者於是礦使四出而採珠權稅稍積鹽括羨
贖者蜂起用事利病盡歸閹宦而公之術始窮卽百
言之弗入矣公自領大司農事十年凡三考而晉太
子太保其侍經筵讀廷試卷胡常主筆郊廟陪祀
及喪勞冊璽寶鏤金幣之賜不可一二數家宰缺則

命署銓御史大夫缺則命攝憲廷臣中眷倚無兩公
亦感激知遇居平深念世受國恩當殫竭忠勤以圖
報稱每有敷奏披瀝惻誠冀幸感動不徒翹諫以招
主過而自爲名乃婉曲轉移有頗諫所不能得晨起
入署諸曹郎以次稟畫裁決略盡退而題覆章疏占
荅箋記筆不停揮盡酉而後出至不知有寒暑旣寢
疾猶時驚起喀喀嚔語家人不其解然要皆公朝事
嗟乎可謂鞠躬盡瘁死而後已者矣乃忌者妄詆欺
加非于公至歿而追咎會估事伐其喪此狀所爲痛
恨于捷幡之口而力白其誣者也賴主上仁聖恩

禮始終無少殺則何損於公之光大焉公體貌魁岸
瞻視有威而襟度坦夷絕無矯飾余嘗竊窺公位崇
而恪慎如庶官祿厚而清約如寒士身兼數器而沈
深樸茂望之如木強人也嘆以爲所養不可及跡其
建豎乃一奉襄毅公之遺矩而步趨之世濟其美不
隕厥問盛矣哉

焦太史編輯國朝獻徵錄卷之二十九終